

Гіса МасихІ акІни

1 Іт замана хІукму дурабухъун, сунезибра пача Августли лерилра мераначиб хІербирути адамти белгибарахъес хъарбарибси. 2 Ил цаибил хІисаб сабри, сабира Сириялис Квиринийли бекІдеш дирухІели дураберкІибси. 3 СияхІлизи белкІахъес лебилра арбякъун, гъарил — сунела шагъарлизи. 4 Галиллизибси Назарет шагъарлизивад Юсупра арякъун Ягъудейлизи, сунес Вифлеем или бикІуси Даудла шагъарлизи, 5 сенкІун ил Даудла наслулизивадси сайри. СияхІлизи уми делкІахъес ил сунела гелешмеш Мариямличил варх арякъун, ил дурхІялис раилири. 6 Вифлеемлизи сабаибхІели, илини дурхІя варкъес замана баилири. 7 Илала цаибил урши акІуб, ругрума вергур ва хІяйванти далхуси тІенила каркъиб, сенкІун карбан сарайлаб илдас мер аги. 8 Илабад гъарахъли ахІи хІенкъулаби лебри, илди авлахъличиб хІербирулри ва дугели хІенкълис къараул бирулри. 9 Илдала гъалав Аллагъла малаик дакІуиуб, Аллагъла чевяхІдешла лямцІли илди шалабарилри. 10 Илди лебгІеб уркІбухъун. Амма малаикли илдази иб: 11 «УрухмакІудая! Нуни хІушаб гІяхІла хабар лебхулра — лебилра халкълис чебяхІси разидеш! 12 ИшбархІи Даудла шагъарлизив хІушаб Берцуди лебхан акІуб — МасихІ, Къудратла вегІ. ХІерая хІушаб лишан: чІянкІилизи вергурси урши хІушани мицІирагла тІенилав ургидая». 13 Хабарагарли малаикла мякълаб Аллагълис булгути закла агълу дакІубиуб: 14 «Закла чедивси Аллагълис — деза! Ванзаличибти халкъанас — Сунени дигиличил хІеркабирахъути адамтас — даршудеш!» 15 Малаикуни заки ахъбиубли арбякъунхІели, хІенкъулаби цализи ца бикІесбяхІиб: «Даширая Вифлеемлизи аркъехІе, сунечила нушази Аллагъли багъахъурси анцІбукъ секъяйда таманбиубал хІердилзехІе». 16 Илди гъалакли гъунчи дурабухъун, Мариямра, Юсупра, тІенилав каркъибси уршира уббаргиб. 17 Урши чеибхІели илдани Сунечила гъалахили чузи багъахъниличила буриб. 18 ХІенкъулабала хабарли иличи лехІахъибти лебилра уркІаиб. 19 Мариямли биалли гъар секІал

уркИиличи дурцулри ва илдачила пикрикарикIулри. 20 Чули
чедаибти гъар секIал багъандан Аллагъ чевяхIирули ва дезна
биркъули, хIенкъулаби гIелабяхIли чарбухъун: гъарли-марли гъар
секIал гъалахили малаикли буриливан детаур.